

# Pregled Dokumentata | Broj 46/24

Početna (/) / Dokumenti (/Docs/) / Službene novine Kantona Sarajevo (/Docs/Drzavni) / Dokumenti pregled

## Službene novine Kantona Sarajevo, broj 46/24

Na osnovu člana 22. stav (1) tačka d) i člana 23. Zakona o zaštiti na radu ("Službene novine Federacije BiH", broj 79/20), u vezi sa članom 55. Zakona o radu ("Službene novine Federacije BiH", br. 26/16, 89/18 i 44/22 i 39/24) i člana 66. st. (1) i (2) Zakona o organizaciji organa uprave u Federaciji Bosne i Hercegovine ("Službene novine Federacije BiH", broj 35/05), na temelju Akta o procjeni rizika na radnim mjestima i mjestima rada u radnoj okolini, broj 026-25-APR/24 od 20.5.2024. godine, ministrica za nauku, visoko obrazovanje i mlade Kantona Sarajevo donosi

### PRAVILNIK

## O ZAŠTITI NA RADU U MINISTARSTVU ZA NAUKU, VISOKO OBRAZOVANJE I MLADE KANTONA SARAJEVO

### POGLAVLJE I - OSNOVNE ODREDBE

#### Član 1.

##### (Predmet pravilnika)

Ovim pravilnikom se utvrđuje organizacija provođenja zaštite na radu, pravila prevencije i zaštite, poslovi s povećanim rizikom, poslovi na kojima se provodi mjera skraćivanja radnog vremena, način utvrđivanja zdravstvenog stanja radnika koji rade na poslovima s povećanim rizikom, i drugih radnika, sredstva i opremu osobne zaštite koja pripadaju radniku, te prava i obaveze i odgovornosti radnika za zaštitu na radu i drugih radnika u ovoj oblasti, kao i druga pitanja od značaja za sigurnost i zaštitu zdravlja na radu.

#### Član 2.

##### (Definisanje pojmova)

Pojmovi i izrazi koji se koriste u ovom pravilniku imaju isto značenje određeno Zakonom o zaštiti na radu ("Službene novine Federacije BiH", broj 79/20) (u daljem tekstu: Zakon o zaštiti na radu) i podzakonskim propisima donesenim na osnovu tog zakona.

#### Član 3.

##### (Rodna neutralnost izraza)

Izrazi koji se koriste u ovom pravilniku, a imaju rodno značenje, jednako se odnose na oba pola.

### POGLAVLJE II - ORGANIZACIJA PROVOĐENJA ZAŠTITE NA RADU

#### Član 4.

##### (Obavljanje poslova zaštite na radu)

(1) Ministarstvo za nauku, visoko obrazovanje i mlade Kantona Sarajevo (u daljem tekstu: Poslodavac) samostalno obavlja poslove zaštite na radu na mjestima rada u ul. Reisa Džemaludina Čauševića broj 1, u kancelarijama br. 32, 216, 224 i 304 i

Obala Kulina bana broj 4 u Sarajevu, u kancelariji br. 6, u skladu sa Zakonom o zaštiti na radu, Pravilnikom o načinu i uslovima obavljanja poslova zaštite na radu kod poslodavca ("Službene novine Federacije Bosne i Hercegovine", broj 34/21) i drugim propisima kojima se uređuje oblast zaštite na radu, i u skladu sa Aktom o procjeni rizika na radnim mjestima i mjestima rada u radnoj okolini, broj 026-25-APR/24 od 20.5.2024 godine (u daljem tekstu: Akt o procjeni rizika).

(2) Stručna služba za zajedničke poslove za potrebe Poslodavca vrši poslove obezbjeđenja zgrada sjedišta Poslodavca, kao i poslove održavanja i korištenja voznog parka, poslove protivpožarne zaštite, održavanja i zagrijavanja kancelarijskih prostorija, shodno Uredbi o osnivanju Stručne službe za zajedničke poslove ("Službene novine Kantona Sarajevo", broj 31/23).

(3) Prilikom organizovanja poslova zaštite na radu Poslodavac vodi računa o broju radnika koji je utvrđen Pravilnikom o unutrašnjoj organizaciji Ministarstva za nauku, visoko obrazovanje i mlade Kantona Sarajevo, broju lokacija odvojenih mjesta rada, opasnostima i rizicima po zdravlje radnika.

(4) Pri obavljanju poslova zaštite na radu Poslodavac osigurava takve uslove na radu kojima se u najvećoj mogućoj mjeri sprječava nastanak povreda na radu, profesionalnih oboljenja i oboljenja u vezi sa radom i koji stvaraju pretpostavke za punu psihičku, fizičku i socijalnu sigurnost zaposlenih.

(5) Poslodavac ostvaruje zaštitu na radu primjenom svih mjera zaštite na radu u skladu sa opštim mjerama prevencije.

### **Član 5.**

#### **(Saradnja sa drugim poslodavcima koji obavljaju djelatnost na istom mjestu rada)**

(1) Poslodavac putem Stručne službe za zajedničke poslove saraduje sa drugim poslodavcima koji obavljaju djelatnost na istim mjestima rada kao i Poslodavac u ul. Reisa Džemaludina Čauševića broj 1 i Obala Kulina bana broj 4, Sarajevo, u cilju provođenja propisa o sigurnosti i zaštiti na radu, te će sa njima usklađivati aktivnosti u cilju zaštite radnika i sprečavanja rizika na radu.

(2) Poslodavac će obavještavati druge poslodavce iz stava (1) ovog člana o rizicima na radu.

## **POGLAVLJE III - PROCJENA RIZIKA I UTVRĐIVANJE POSLOVA SA POVEĆANIM RIZIKOM**

### **Član 6.**

#### **(Procjena rizika)**

(1) Poslodavac je u skladu sa Zakonom o zaštiti na radu, Pravilima o procjeni rizika ("Službene novine Federacije BiH", broj 23/21) i drugim važećim propisima izradio Akt o procjeni rizika na mjestima rada koji sadrži opis procesa rada s procjenom rizika od povreda ili oštećenja zdravlja na mjestu rada u radnoj okolini i mjere za otklanjanje ili smanjivanje rizika na najmanju moguću mjeru u cilju poboljšanja sigurnosti i zaštite zdravlja na radu.

(2) Poslodavac obavještava radnike o rezultatima procjene rizika kao o mjerama i kojima se rizici otklanjanju ili umanjuju, a pismenim putem o tome obavještava zaposlenu ženu za vrijeme trudnoće i dojenja, kao i radnika sa promijenjenom radnom sposobnošću.

### **Član 7.**

#### **(Utvrdjeni rizici)**

(1) Aktom o procjeni rizika su na radnim mjestima kod Poslodavca utvrđeni slijedeći nivoi rizika:

Redni broj	Naziv radnog mjesta	Nivo procijenjenog rizika
1.	Ministar	Prihvatljiv rizik
2.	Sekretar ministarstva	Prihvatljiv rizik
3.	Pomoćnik ministra za nauku	Prihvatljiv rizik
4.	Stručni savjetnik za nadzor	Beznačajan rizik
5.	Stručni savjetnik za osiguranje uvjeta za kvalitet u oblasti naučno istraživačke djelatnosti	Beznačajan rizik
6.	Stručni savjetnik za definiranje i realizaciju strategije razvoja nauke	Beznačajan rizik
7.	Stručni savjetnik za internacionalne naučno istraživačke i istraživačko razvojne projekte	Beznačajan rizik
8.	Stručni saradnik za poslove savjeta za nauku	Beznačajan rizik
9.	Viši stručni saradnik za saradnju subjekata iz naučnoistraživačke djelatnosti	Beznačajan rizik
10.	Viši stručni saradnik za pravne poslove	Beznačajan rizik
11.	Viši referent za administrativne poslove	Beznačajan rizik
12.	Pomoćnik ministra za visoko obrazovanje	Prihvatljiv rizik
13.	Stručni savjetnik za visoko obrazovanje i nastavu	Beznačajan rizik
14.	Stručni savjetnik za drugostepeno upravno rješavanje	Beznačajan rizik
15.	Stručni savjetnik za kvalitet, akreditaciju i licenciranje visokoškolskih ustanova	Beznačajan rizik
16.	Stručni savjetnik za nadzor	Beznačajan rizik
17.	Stručni savjetnik za jedinstveni informacijski sistem	Beznačajan rizik
18.	Stručni savjetnik za evropske integracije i internacionalne projekte	Beznačajan rizik
19.	Viši stručni saradnik za registre	Beznačajan rizik
20.	Viši stručni saradnik za pravne poslove	Beznačajan rizik
21.	Viši referent za administrativne poslove	Beznačajan rizik
22.	Pomoćnik ministra za mlade	Prihvatljiv rizik
23.	Viši stručni saradnik za saradnju sa omladinskim sektorom i omladinskim udruženjima	Beznačajan rizik
24.	Viši stručni saradnik za koordiniranje međuresorne saradnje u pitanjima mladih	Beznačajan rizik
25.	Stručni saradnik za podršku mladima	Beznačajan rizik
26.	Viši referent za administrativne poslove	Beznačajan rizik
27.	Pomoćnik ministra za finansijsko-računovodstvene poslove	Prihvatljiv rizik
28.	Viši stručni saradnik za saradnju sa omladinskim sektorom i omladinskim udruženjima	Beznačajan rizik
29.	Stručni savjetnik za planiranje i izvršenje budžeta	Beznačajan rizik
30.	Stručni saradnik za budžet	Beznačajan rizik
31.	Stručni savjetnik za informatiku i statistiku	Beznačajan rizik
27.	Stručni savjetnik za analizu i strateško planiranje	Beznačajan rizik
28.	Viši referent- tehnički sekretar	Beznačajan rizik
29.	Viši referent za administrativne poslove	Beznačajan rizik
30.	VKV-vozač	Prihvatljiv rizik

(2) Beznačajan rizik podrazumijeva da je rizik od povrede na radu, oštećenja zdravlja, profesionalnog oboljenja ili oboljenja u vezi sa radom zanemarljiv i da mjere zaštite nisu potrebne.

(3) Prihvatljiv rizik podrazumijeva da je potrebno poboljšati zaštitu od povrede na radu, oštećenja zdravlja, profesionalnog oboljenja ili oboljenja u vezi sa radom, ako je moguće.

#### **Član 8.**

##### **(Poslovi sa povećanim rizikom i poslovi na kojima se provodi mjera skraćivanja radnog vremena)**

Kod Poslodavca nema poslova sa povećanim rizikom, niti poslova na kojima se provodi mjera skraćivanja radnog vremena.

### **POGLAVLJE IV - PRAVILA PREVENCIJE I ZAŠTITE NA RADU**

#### **Član 9.**

##### **(Provođenje mjera prevencije i zaštite na radu)**

(1) Prilikom provođenja mjera zaštite na radu Poslodavac poštuje opšta načela prevencije propisana odredbama člana 21. Zakona o zaštiti na radu.

(2) Poslodavac će radnika neposredno prije stupanja na rad, usmeno upoznati sa mjerama sigurnosti i zaštite na radu, a zaposlenu ženu za vrijeme trudnoće i dojenja kao i radnika sa promijenjenom radnom sposobnošću će obavijestiti pismenim putem.

(3) Radnik ne može zasnovati radni odnos ukoliko prethodno nije utvrđeno da njegovo zdravstveno stanje i psihofizičke sposobnosti odgovaraju zahtjevima određenog radnog mjesta u skladu sa odredbama Zakona o zaštiti na radu i drugim uslovima utvrđenim Zakonom o državnoj službi u Kantonu Sarajevo ("Službene novine Kantona Sarajevo", br. 31/16 i 45/19) i Zakonom o namještenicima u organima državne službe u Federaciji Bosne i Hercegovine ("Službene novine Federacije BiH", br. 49/05 i 103/21), kao i drugim važećim propisima koji se odnose na zapošljavanje.

(4) Mjere zaštite koje provodi Poslodavac neće prouzrokovati finansijske obaveze za radnike.

#### **Član 10.**

##### **(Preventivne mjere)**

(1) Poslodavac osigurava slijedeće preventivne mjere radi zaštite života i zdravlja radnika:

- a) održavanje u ispravnom stanju i vršenje pregleda i ispitivanja sredstava za rad,
- b) obezbjeđivanje adekvatnih uslova radne okoline,
- c) osposobljavanje radnika za siguran i zdrav rad,
- d) obezbjeđivanje sredstava i opreme za ličnu zaštitu na radu, njihovo održavanje u ispravnom stanju,
- e) upućivanje radnika na sistematske preglede minimalno svake četiri godine kod specijaliste medicine rada,
- f) upućivanje radnika na ciljani pregled u ovlaštenu zdravstvenu ustanovu ukoliko se ukaže potreba za tim.

(2) Poslodavac jednom u dvije godine organizuje obuku i provjeru znanja radnika iz oblasti zaštite od požara u skladu sa odredbama Zakona o zaštiti od požara i vatrogastvu ("Službene novine Federacije BiH", br. 64/09).

(3) Poslodavac će na mjestima rada istaći pisana uputstva koja se odnose na rizike po sigurnost i zdravlje sa zaštitnim i preventivnim mjerama koje se preduzimaju za otklanjanje ili smanjenje tih rizika, a u slučaju iznenadne opasnosti po život i zdravlje, takvo uputstvo se može dati i usmeno.

#### **Član 11. (Lična zaštitna oprema)**

U skladu sa Aktom o procjeni rizika na radnim mjestima kod Poslodavca nije potrebno korištenje lične zaštitne opreme.

#### **Član 12. (Upotreba protivpožarnih aparata)**

(1) Stručna služba za zajedničke poslove radnicima obezbjeđuje upotrebu protivpožarnih aparata kao sredstava i opreme zaštite od požara.

(2) Radnici u toku osposobljavanja za siguran i zdrav rad prolaze posebnu obuku o propisima iz oblasti zaštite od požara, kao i o načinu upotrebe i rukovanju protivpožarnim aparatima i evakuaciji u slučaju požara, kako je to propisano članom 10. stav (2) ovog pravilnika.

(3) Stručna služba za zajedničke poslove osigurava da se protivpožarni aparati održavaju u ispravnom stanju.

#### **Član 13. (Periodični pregledi)**

(1) Poslodavac će vršiti slijedeće periodične preglede:

a) preglede sredstava rada koja se prvi put puštaju u rad, a naredni pregledi i ispitivanja se vrše najmanje jednom u tri godine,

b) pregledi i ispitivanje električnih instalacija najmanje jednom u tri godine,

c) pregledi i ispitivanje gromobranskih instalacija na objektima najmanje jednom u dvije godine,

d) pregledi i ispitivanja fizičkih, hemijskih i bioloških štetnosti i mikroklima u radnim i pomoćnim prostorijama u ljetnjem i zimskom periodu jednom u tri godine.

(2) Periodičnim pregledima i ispitivanjima ne podliježu audio i video oprema, oprema za informacionu tehnologiju i uobičajena kancelarijska oprema.

(3) Preglede iz stava (1) ovog člana Poslodavac vrši putem ovlaštene organizacije koja ima dozvolu Federalnog ministarstva rada i socijalne politike za obavljanje tih poslova.

(4) Periodični pregledi iz stava (1) ovog člana se vrše u skladu sa Zakonom o zaštiti na radu, Pravilnikom o načinu, postupku i rokovima vršenja periodičnih pregleda i ispitivanja iz oblasti zaštite na radu ("Službene novine Federacije BiH", br. 23/21) i drugim važećim propisima iz oblasti zaštite na radu, kao i propisima o standardizaciji u Bosni i Hercegovini, tehničkim propisima i uputstvima proizvođača.

#### **Član 14. (Osposobljavanje radnika)**

Poslodavac će u skladu sa Zakonom o zaštiti na radu osposobiti radnike za siguran i zdrav rad, a poslove osposobljavanja povjerava ovlaštenoj organizaciji iz člana 64. Zakona o zaštiti na radu.

**Član 15.**  
**(Savjetovanje i uključivanje radnika)**

Poslodavac se savjetuje sa radnicima i njihovim predstavnicima i omogućava im da učestvuju u raspravama o svim pitanjima u pogledu sigurnosti i zaštite zdravlja na radu, a posebno im omogućava da učestvuju u:

- a) raspravama i odobravanju svih mjera u pogledu sigurnosti i zaštite zdravlja na radu,
- b) svakoj mjeri koja može značajno uticati na sigurnost i zaštitu zdravlja na radu,
- c) imenovanju radnika koji će obavljati poslove vezane za obezbjeđenje zdravih i sigurnih uvjeta rada, prve pomoći, gašenje požara i evakuaciju radnika,
- d) angažovanju, tamo gdje je potrebno, ovlaštenih organizacija za zaštitu na radu,
- e) planiranju i organizovanju osposobljavanja radnika u oblasti zaštite na radu.

**Član 16.**  
**(Radnici za mjere prve pomoći, protivpožarne zaštite i evakuacije radnika)**

(1) Poslodavac će radi provođenja odredbi člana 36. stav (1) Zakona o zaštiti na radu na mjestima rada u ul. Reisa Džemaludina Čauševića broj 1, i Obala Kulina bana broj 4, Sarajevo, imenovati radnike za mjere prve pomoći, protivpožarne zaštite i evakuacije radnika.

(2) Radnici za mjere prve pomoći, protivpožarne zaštite i evakuacije radnika će povodom pitanja vezanih za provođenje odredbi člana 36. stav (1) Zakona o zaštiti na radu sarađivati sa Stručnom službom za zajedničke poslove u pitanjima koja spadaju u nadležnost te službe.

**POGLAVLJE V - OSTALE ODREDBE**

**Član 17.**  
**(Obavještanje sindikata)**

(1) Poslodavac najmanje dva puta godišnje obavještava Samostalni sindikat državnih službenika i namještenika Kantona Sarajevo kao i Samostalni sindikat državnih službenika i namještenika u organima državne službe, sudskoj vlasti i javnim ustanovama u Federaciji Bosne i Hercegovine o rizicima po sigurnost i zdravlje i mjerama koje je preduzeo i koje planira da preduzme radi unaprjeđivanja sigurnosti i zaštite zdravlja.

(2) Obavještenja iz stava (1) ovog člana dostavljaju se sindikatima do 31.07. za prvu polovinu tekuće godine i do 31.12. za drugu polovinu tekuće godine.

(3) Poslodavac će posebno obavijestiti i savjetovati se sa predstavnicima radnika i sa radnicima nakon smrtne, grupne ili teške povrede na radu, utvrđenog slučaja profesionalnog oboljenja kao i u slučaju da nadležna inspekcija utvrdi nedostatak u primjeni mjera zaštite na radu.

**Član 18.**  
**(Vođenje evidencija)**

Poslodavac vodi evidenciju o:

- a) provjeri znanja radnika iz oblasti sigurnosti i zaštite na radu,
- b) održanim obukama o propisima iz oblasti zaštite od požara,

- c) izvršenim pregledima i ispitivanjima radne sredine i sredstava za rad,
- d) povredama na radu, profesionalnim oboljenjima, smrtnim slučajevima i njihovim uzrocima,
- e) ljekarskim pregledima radnika.

### **Član 19.** **(Sadržaj evidencija)**

Evidencije iz člana 18. ovog pravilnika sadrže slijedeće podatke:

- a) evidencija o provjeri znanja radnika iz oblasti sigurnosti i zaštite na radu sadrži ime i prezime i naziv radnog mjesta radnika, podatke o ovlaštenoj organizaciji i licu koje pruža obuku, datum obuke i provjere znanja, kratak opis sadržaja obuke, napomenu o ishodu provjere znanja kao i druge eventualne napomene,
- b) evidencija o održanim obukama o propisima iz oblasti zaštite od požara sadrži ime i prezime i naziv radnog mjesta radnika, podatke o ovlaštenoj organizaciji i licu koje pruža obuku, datum obuke i provjere znanja, kratak opis sadržaja obuke, napomenu o ishodu provjere znanja kao i druge eventualne napomene od značaja,
- c) evidencija o izvršenim pregledima i ispitivanjima radne sredine i sredstava za rad sadrži napomenu o objektu u kojem su vršeni pregledi i ispitivanja, kratak opis radne ili pomoćne prostorije za koju je vršen pregled (broj sprata, broj prostorije, kvadratura i eventualni šematski prikaz pozicije prostorije), podatke o ispitanom sredstvu rada, podatke o ovlaštenoj organizaciji koja vrši preglede i ispitivanja, podatke o rezultatima pregleda i ispitivanja, i eventualnim predloženim mjerama za poboljšanje uslova rada, kao i druge eventualne napomene od značaja,
- d) evidencija o povredama na radu, profesionalnim oboljenjima, smrtnim slučajevima i njihovim uzrocima sadrži podatke o radniku, kratak opis povrede, profesionalnog oboljenja ili smrtnog slučaja, težinu povrede (lakša, teža, smrtni slučaj), datum i vrijeme nastanka povrede, uzrok povrede, profesionalnog oboljenja ili smrtnog slučaja, podatke o mjerama preduzetim radi otklanjanja rizika, odnosno uzroka nastanka povrede, profesionalnog oboljenja ili smrtnog slučaja, podatak o dužini trajanja privremene spriječenosti za rad, kao i druge eventualne napomene od značaja,
- e) evidencija o ljekarskim pregledima radnika sadrži ime i prezime i naziv radnog mjesta radnika, podatke o ovlaštenoj zdravstvenoj ustanovi koje je izvršila ljekarski pregled, datum ljekarskog pregleda, podatke o utvrđenoj radnoj sposobnosti i eventualnom profesionalnom oboljenju ili invalidnosti, kao i druge eventualne napomene od značaja.

### **Član 20.** **(Dostavljanje izvještaja o povredi na radu i profesionalnom oboljenju)**

(1) Poslodavac će dostaviti izvještaj o povredi na radu koja se dogodi i profesionalnom oboljenju koje nastane na radnom mjestu, radniku koji je pretrpio povredu, odnosno kod kojeg je nastalo oboljenje, nadležnom zavodu zdravstvenog osiguranja kod kojeg je radnik zdravstveno osiguran, kao i nadležnoj inspekciji rada, u roku od sedam dana od dana pretrpljene povrede odnosno nastanka oboljenja.

2) Izvještaj iz stava (1) ovog člana podnosi se na obrascu čiji sadržaj i način podnošenja propisan Pravilnikom o sadržaju i načinu podnošenja izvještaja o povredi na radu i profesionalnoj bolesti ("Službene novine Kantona Sarajevo", broj 9/23).

### **Član 21.** **(Obaveza obavještanja inspekcije rada)**

(1) O svakom smrtnom slučaju, težoj povredi na radu, profesionalnom oboljenju i svakoj pojavi koja bi mogla ugroziti život ili zdravlje radnika na radu Poslodavac će odmah obavijestiti Kantonalnu upravu za inspeksijske poslove - Inspektorat rada, zaštite na radu i socijalne zaštite.

(2) Za svaku povredu na radu Poslodavac je dužan na uviđaj pozvati neposrednog rukovodioca povrijeđenog radnika.

## POGLAVLJE VI - PRIJELAZNE I ZAVRŠNE ODREDBE

### Član 22. (Primjena propisa)

Na sva pitanja koja nisu regulisana odredbama ovog pravilnika, primjenjuju se važeći propisi koji se odnose na zaštitu na radu.

### Član 23. (Izmjene i dopune pravilnika)

Poslodavac će pristupiti izmjenama i dopunama Akta o procjeni rizika i ovog pravilnika u slučajevima propisanim Zakonom o zaštiti na radu i Pravilima o procjeni rizika.

### Član 24. (Stupanje na snagu)

Ovaj pravilnik stupa na snagu osmog dana od dana objavljivanja u "Službenim novinama Kantona Sarajevo".

Broj 27-01/2-30-38271/24  
20. septembra 2024. godine  
Sarajevo

Ministrica  
Prof. dr. **Adna Mesihović**, s. r.

Hvala što ste naš pretplatnik. Koristite pogodnosti koje dobijate pretplatom.

### O nama

Javno preduzeće Novinsko-izdavačka organizacija SLUŽBENI LIST BOSNE I HERCEGOVINE. Sva prava pridržana. 2014

### Adresa

Džemala Bijedića 39/III  
71000 Sarajevo  
Bosna i Hercegovina  
Email: [slist@slist.ba](mailto:slist@slist.ba) (mailto:slist@slist.ba)